



Broj/Број: 01/2a-50-1-2-30/08
Sarajevo/Сарајево, 30.7.2008.godine

ZAPISNIK

30. sjednice Komisije za vanjske poslove Predstavničkog doma Parlamentarne skupštine Bosne i Hercegovine, održane 29. 7. 2008.

Sjednica je počela u 9,30 sati. Sjednici su prisustvovali članovi Komisije: Slavko Matić, Azra Hadžiahmetović, Milica Marković, Sadik Ahmetović, Azra Alajbegović, Denis Bećirović i Sefer Halilović. Odsustvovali su Milorad Živković i Husein Nanić.

Osim članova i privremenog sekretara Komisije Davorina Semenika, sjednici je prisustvovala i Bejta Ramović iz Ministarstva finansija i trezora BiH.

Na početku sjednice predsjedavajući Slavko Matić pozdravio je prisutne i otvorio raspravu o dnevnom redu.

Na početku rasprave Denis Bećirović zatražio je da se dvije tačke koje su naknadno uvrštene u dnevni red, Sporazum o kreditu o modernizaciji Univerziteta u Zenici i Sporazum o finansiranju – Projekat putne infrastrukture i sigurnosti na putevima, skinu s dnevnog reda, pravdajući to nepoznavanjem same materije sporazuma koji su naknadno stigli.

Azra Hadžiahmetović rekla je da ne bi bilo dobro ne uvrstiti u dnevni red dva sporazuma o kreditu i finansiranju zbog pauze koja će uslijediti zbog godišnjih odmora.

Denis Bećirović ponovo je istaknuo da ne želi da se izjašnjava o nečemu što nije pročitao.

Predsjedavajući Slavko Matić rekao je da se radi o hitnim sporazumima i, s obzirom da Dom neće zasjedati do septembra, predložio da se omogući poslanicima da se upoznaju o sadržaju sporazuma.

Milica Marković kazala je da nije za to da se dvije tačke skinu s dnevnog reda, podržavajući predsjedavajućeg Slavka Matića.

Azra Alajbegović je također podržala prijedloge da se u dnevni red uvrste spomenuti sporazumi zbog toga što se radi o važnim projektima.

Sadik Ahmetović podržao je predloženi dnevni red dopunjen s dva nova sporazuma.

Nakon rasprave članovi Komisije su većinom glasova usvojili sljedeći

DNEVNI RED

1. Usvajanje Zapisnika 29. sjednice Komisije;
2. Davanje mišljenja o saglasnosti za ratifikaciju Ugovora o kreditu između Bosne i Hercegovine i OPEC-ovog Fonda za međunarodni razvoj – Projekat rekonstrukcije željeznica dionica (I) Sarajevo – Bradina (resorno ministarstvo: Ministarstvo finansija i trezora BiH);
3. Davanje mišljenja o saglasnosti za ratifikaciju Sporazuma između Bosne i Hercegovine i Bank Austria Creditanstalt AG – Projekat izgradnje vodosnabdijevanja u općini Srbac (resorno ministarstvo: Ministarstvo finansija i trezora BiH);
4. Davanje mišljenja o saglasnosti za ratifikaciju Sporazuma o kreditu između Bosne i Hercegovine, koju zastupa Ministarstvo finansija i trezora BiH, i Raiffeisen Zentralbank Österreich Aktiengesellschaft – Modernizacija Univerziteta u Zenici (resorno ministarstvo: Ministarstvo finansija i trezora BiH);
5. Davanje mišljenja o saglasnosti za ratifikaciju Sporazuma o finansiranju između Bosne i Hercegovine i Međunarodne asocijacije za razvoj – Projekat putne infrastrukture i sigurnosti na putevima (resorno ministarstvo: Ministarstvo finansija i trezora BiH);
6. Informacija – zapisnik sa zajedničke sjednice Komisije za vanjske poslove Predstavničkog doma Parlamentarne skupštine BiH i Komisije za vanjsku i trgovinsku politiku, carine, saobraćaj i komunikacije Doma naroda Parlamentarne skupštine BiH s novoimenovanim ambasadorima Bosne i Hercegovine.

Ad. 1. Usvajanje Zapisnika 29. sjednice Komisije

Zapisnik je usvojen jednoglasno i bez rasprave.

Ad. 2. Davanje mišljenja o saglasnosti za ratifikaciju Ugovora o kreditu između Bosne i Hercegovine i OPEC-ovog Fonda za međunarodni razvoj – Projekat rekonstrukcije željeznica dionica (I) Sarajevo – Bradina (resorno ministarstvo: Ministarstvo finansija i trezora BiH)

Predsjedavajući Komisije Slavko Matić dao je riječ predstavnici resornog ministarstva Bejti Ramović kako bi rekla nešto više o Ugovoru. Predstavnica Ministarstva navela je osnovne karakteristike kredita kao i to da je rok otplate 20 godina s grejs periodom od pet godina.

Na prijedlog predsjedavajućeg Komisije, bez rasprave i jednoglasno, dato je pozitivno mišljenje da se Predstavničkom domu predloži ratificiranje Ugovora o kreditu između Bosne i Hercegovine i OPEC-ovog Fonda za međunarodni razvoj.

Ad. 3. Davanje mišljenja o saglasnosti za ratifikaciju Sporazuma o kreditu između Bosne i Hercegovine i Bank Austria Creditanstalt AG – Projekat izgradnje vodosnabdijevanja u općini Srbac (resorno ministarstvo: Ministarstvo finansija i trezora BiH)

Bejta Ramović kazala je da se radi o kreditu u iznosu od 1.7 miliona eura s rokom otplate od 12,5 godina i grejs periodom od 4,5 godine. Upoznala je Komisiju i sa ostalim detaljima Sporazuma.

Nije bilo rasprave. Članovi Komisije su, na prijedlog predsjedavajućeg Slavka Matića, jednoglasno dali pozitivno mišljenje za ratifikaciju ovog sporazuma.

Ad. 4. Davanje mišljenja o saglasnosti za ratifikaciju Sporazuma o kreditu između Bosne i Hercegovine, koju zastupa Ministarstvo finansija i trezora BiH, i Raiffeisen Zentralbank Österreich Aktiengesellschaft – Modernizacija Univerziteta u Zenici (resorno ministarstvo: Ministarstvo finansija i trezora BiH)

Predsjedavajući Slavko Matić pozvao je Bejtu Ramović da detaljnije upozna Komisiju o Sporazumu.

Bejta Ramović kazala je da se radi o sredstvima za nabavku opreme za Univerzitet u Zenici i da je ovaj sporazum bio u paketu s kreditom za nabavku medicinske opreme u Mostaru, ali se tek sad našao na dnevnom redu.

Nakon izlaganja Bejte Ramović, budući da nije bilo rasprave, članovi Komisije su, s pet glasova "za" i dva "suzdržana", dali pozitivno mišljenje Predstavničkom Domu u vezi s ratifikacijom Sporazuma o kreditu.

Ad. 5. Davanje mišljenja o saglasnosti za ratifikaciju Sporazuma o finansiranju između Bosne i Hercegovine i Međunarodne asocijacije za razvoj – Projekat putne infrastrukture i sigurnosti na putevima (resorno ministarstvo: Ministarstvo finansija i trezora BiH)

Bejta Ramović je, govoreći u ime Ministarstva finansija i trezora BiH, istakla da se radi o kreditu od 25 miliona dolara za puteve u dužini od 260 km, od kojih bi 50 % pripalo Federaciji BiH, a 50 % Republici Srpskoj. Naglasila je da se radi o posljednjem sporazumu pod posebnim uslovima sa Svjetskom bankom.

Nakon izlaganja predstavnice resornog ministarstva, predsjedavajući Slavko Matić predložio je članovima Komisije da daju pozitivno mišljenje za ratifikaciju pomenutog sporazuma.

Sa pet glasova "za" i dva "suzdržana", Komisija je dala pozitivno mišljenje Predstavničkom domu za ratifikaciju Sporazuma.

Ad. 6. Informacija – zapisnik sa zajedničke sjednice Komisije za vanjske poslove Predstavničkog doma Parlamentarne skupštine BiH i Komisije za vanjsku i trgovinsku politiku, carine, saobraćaj i komunikacije Doma naroda Parlamentarne skupštine BiH s novoimenovanim ambasadorima BiH

Članovi Komisije primili su k znanju Informaciju - zapisnik sa zajedničke sjednice dviju komisija s novoimenovanim ambasadorima.

Predsjedavajući Slavko Matić se na kraju još jednom zahvalio članovima Komisije na prisustvu.

Sjednica je završena u 9,50 sati.

Zapisnik sačinio:

Miroslav Stanišić, stručni saradnik u Komisiji za vanjske poslove

Privremeni sekretar Komisije

Davorin Semenik

Predsjedavajući Komisije

Slavko Matić